

Bunas notas per radio e televisiun

SRG ha ina funcziun da coesiun naziunala

DA LUCAS DEPLAZES / ANR

■ En connex cun la votaziun davart las taxas per la SRG SSR ha quai dà dira critica envers radio e televisiun. La SRG SSR saja bler memia dominanta, fetschia emissiuns che n'hajan da far nagut cun il service public. Il tenor è stà da definir pli cler l'incumbensa da la SRG SSR. Il parlament ha alur dumandà dal cussegl federal in rapport surlonder. Il cussegl federal vul sviluppar vinavant il service public, senza far midadas da la constituziun. Il cussegl dals chantuns ha manà glindesdi saira ina lunga debatta davart il service public e la SRG SSR.

Hannes Germann (pps/SH) propona da returnar il rapport al cussegl federal e da pretender ina pli clera posiziun davart l'incumbensa da la SRG SSR e da las instituziuns privatas cun ina sumeglianta incumbensa.

Auta qualidad e professionalitad

Claude Janiak (pss/BL) ha accentuà la muntada naziunala da la SRG SSR cun sias prestaziuns per la communitad. Radio e televisiun en lur furma federalistica han ina impurtanta funcziun da coesiun da la Svizra. *Konrad Graber* (pcd/LU) ha fatg attent a l'incumbensa dad SRG SSR francada en la Constituziun federala che pretenda er ina contribuziun a la furmaziun ed al svilup cultural, a la furmaziun libra da l'opiniun ed al divertiment. Radio e televisiun ston resguardar las atgnadads dal pajais ed ils basegns dals chantuns. El ha tschentà la dumonda centrala «vulain nus vinavant quest service public

per tut las regiuns ed en tut las quatter linguas naziunalas?» La resposta sappia mo esser in cler gea. La Svizra basegna in service public independent, multifar e da buna qualidad. La SRG SSR porchia in servetsch public d'auta qualidad e professiunalitad. *Stefan Engler* (pcd/GR) dumonda, tgi gudogna sche la SRG SSR vegn spossada en sia funcziun d'integraziun? Service public munta survir a la communitad.

Independenza

La cussegliera federala *Doris Leuthard* tschenta la dumonda concreta: «Schai a mai nua che l'incumbensa duai vegnir reducida. Vulais vus stritgar la cultura u il sport? Jau n'hai udì naginas propostas concretas.» Nus vulain mantegnair l'indipendenza. Ils emetturs privats pon far contribuziuns politicas tenor lur parairi. La Svizra dovra ina instituziun sco la SRG SSR, finanziada cun contribuziuns fixadas. Quellas muntan actualmain 1,2 milliardas francs e duain tanscher er per il futur. Leuthard ha fatg attent a la situaziun cultural-linguistica e menziunà che 45% da las taxas vegnian impundidas per la Svizra da lingua tudestga ed il rest è reservà per las ulteriuras linguas da noss pajais.

La ministra da traffic e communicaziun ha fatg allusiun a la situaziun brutala en il sectur da la reclama che muntia in grev problem per nossa pressa. Da las passa tschintg milliardas francs ha pers la pressa ina gronda part. Quella perdita vegnia investida oz en emissiuns online, savens senza promover l'infurmaziun dal pievel.